





# **Акафист**

## **Собору Святых Архангелов**

### **Кондак 1**

Избранныи Господем от Сил Небесных на служение человекам, Архангели светоноснии, у престола Вседержителя предстоящи и песнь трисвятую Ему воспевающии, величаем вас, скорых помощников и молитвенников наших, и с благодарением возглашаем вам: Радуйтесь, святии Архистратизи, Божественныя славы небеснии служителие.

### **Икос 1**

Ангелов начальницы и человеков наставницы, седмочисленнии Архангели, Предвечнаго Бога служителие преизряднии, вы во славе Царя Небеснаго непрестанно пребываете и молитвы всех взывающих к Нему ко престолу Его возносите. К вам мы ныне притекаем и на ваше благомоощное предстательство уповая, таковыя похвалы со умилением сердечным восписуем: Радуйтесь, Творца неба и земли в неизреченней славе созерцающии. Радуйтесь, во благоухании святыни Его присно пребывающии. Радуйтесь, Пресвятей Троице славословия благоговейно возносящии. Радуйтесь, достойно и праведно

Богу поклоняться нас научающий. Радуйтесь, от рабства диавольского нас свободяющий. Радуйтесь, светом Божественных истинных существ во тьме озаряющий. Радуйтесь, к подвигам духовным нас призывающий. Радуйтесь, в скорбях душевных и недугах телесных нас укрепляющий. Радуйтесь, святые Архистратизы, Божественные славы небесных служителие.

### **Кондак 2**

Видящи прегордаго денницу, противу Бога ополчившагося и рекшаго во уме своем: «На небо взыду, выше звезд небесных поставлю престол мой», всехвальный Архистратиже Михаиле, отвечал еси ему: «Кто подобен Богу? Кто, яко Бог!» и со всеми Ангелы, верными Господеви, низверг еси падшия аггелы в бездну преисподнюю. Мы же, сия воспоминаая, усердно молим тя, благословенный хранителю рода христианскаго, утверди ны в вере к Богу и сподоби купно с тобою и со всеми лики небесными благодарне воспевати Творцу: Аллилуиа.

### **Икос 2**

Разум человеческий не возможет постигнути всех тайн великаго Промысла Божественнаго о спасении нашем, ибо Всеблагий Творец за

премногую любовь Свою к нам, недостойным, благоволил есть послати Ангелы Своя на служение спасению нашему. Мы же, с благодарностию сие принимая, величаем тя, светозарный Первоангеле Михаиле, и радостно приносим ти похвалы сия: Радуйся, от Господа власть на нечистыя духи приявый. Радуйся, силою твоею полки демонския попираяй. Радуйся, силою Божиею козни диавольския разрушаяй. Радуйся, недугующим здравие и отраду подаваяй. Радуйся, от соблазнов и искушений нас оберегаяй. Радуйся, от тьмы греховныя ко свету Христову нас приводяй. Радуйся, немощныя духом силою благодати Божией исполняяй. Радуйся, плотию изнемогающия всеоружием веры облакаяй. Радуйтесь, святии Архистратизи, Божественныя славы небеснии служителие.

### **Кондак 3**

Силою свыше укрепи нас, светозарный Архистратиже Михаиле, да не погибнем люте без покаяния во унынии и отчаянии, но утверди и настави нас в терпении и благоугождении Богу, да разумеем волю Его святую, благую и совершенную, и непрестанно восхваляя Троицу Единосущную, ангельския сонмы нашего ради спасения на землю

посылающую, во умилении взываем: Аллилуиа.

### **Икос 3**

Имеяй к роду человеческому, Господом от грехов искупленному, небесное попечение, всем просящим руку помощи простираеши, о всеблагий наш заступниче и покровителю, недуги врачуя, скорби утоляя, страсти угашая, яко выну предстоиши пред престолом Триипостаснаго Господа и Владыки нашего. Сего ради просим тя: не презри нас, боголюбиве Михаиле, в печалех и скорбех наших к тебе притекающих и вопиющих: Радуйся, помощью твоею уповающих на Тя не оставляяй. Радуйся, в вере в Бога своим примером нас утверждаяй. Радуйся, всех добре подвизающихся в благочестии укрепляяй. Радуйся, на благое и душеполезное нас наставляяй. Радуйся, суетная прелести мира сего презирати нас научаяй. Радуйся, скорби и смущения сердец наших утоляяй. Радуйся, гневливья и невоздержанныя вразумляяй. Радуйся, болящия и безнадежныя от одра болезни возставляяй. Радуйтесь, святии Архистратизи, Божественныя славы небеснии служителие.

### **Кондак 4**

Буря помышлений радостных охвати сердце Пречистыя Девы Марии, егда ты, всеславный

Архангеле Гаврииле, возвестил еси Ей о воплощении Сына Божия, глаголя: «Радуйся, Благодатная, Господь с Тобою!» Мы же, ныне сия поминающе, величаем Дивнаго во святых Своих Господа, вопиюще Ему о Тебе: Аллилуиа.

#### **Икос 4**

Слышавше о дивном служении твоём, яко верным слугам Божиим открывал еси тайны милосерднаго Его Промысла о спасении рода человеческого, богославный Гаврииле, пение всерадостное Творцу нашему приносим, и во умилении сердечнем тебе с любовью восписуем: Радуйся, Богоотцев Иоакама и Анну извещением о рождестве Богоматери возвеселивый. Радуйся, о рождестве Спасителя Святей Деве Марии возвестивый. Радуйся, волю Божию о рождестве Предтечи Господня святому Захарии открывый. Радуйся, Апостолов во благовестии Христовем укрепивый. Радуйся, в вере и верности Богу нас утверждаяй. Радуйся, светом Христовым омраченныя умы наша озаряяй. Радуйся, к покаянию и исправлению взоры духовныя наша обращающа. Радуйся, смирению и послушанию нас научаяй. Радуйтесь, святии Архистратизи, Божественныя славы небеснии служителие.

## Кондак 5

Богоявленной звезде, волхвам путь ко Христу указавшей, подобен явился еси, святыи Архангеле Господень Гаврииле, егда возвестил еси женам-мироносицам со ароматы ко гробу Иисусову пришедшим: «Не ищите живаго среди мертвых, Он воскресе». Мы же, сие ныне воспоминающе, смиренно просим тя, преблагословенный Архистратиже Сил Небесных, укрепи веру нашу, и научи нас, подобно женам евангельским, пасхально воспевати Спасителю нашему: Аллилуиа.

## Икос 5

Видевше иноцы горы Афонския, яко силою благодати Божией камень твердый в воск мягкий претворил еси, всехвальне Гаврииле, и на нем перстом своим написал еси словеса песни хвалебныя Богородице Деве, познаху чудо велие и несумненно увероваху, яко тако воистину воспевают Ея горе Силы Небесныя. Ныне же весь род христианский тобою в вере в предстательство Царицы Небесныя утвержденный, тебе, яко наставнику и покровителю своему взывает: Радуйся, путей человеческих исправление. Радуйся, взыскующим горняго Иерусалима богомудрый вождю. Радуйся, обуреваемым страстьми

греховными добрый кормчий. Радуйся, немощных и малоискусных терпеливый учителю. Радуйся, изнемогающим от уныния и печали благоприятное утешение. Радуйся, милости Божия струя неизсякаемая. Радуйся, радости духовныя, тишины и мира источниче неисчерпаемый. Радуйся, сиянием благодати Божия души наша озаряющий. Радуйтесь, святии Архистратизи, Божественныя славы небеснии служителие.

### **Кондак 6**

Проповедует весь мир христианский служение твое роду человеческому, святой Архангеле Божий Рафаиле, яко провозвестника судеб Божиих и всеблаготворного молитвенника за ны ко Господу. За таковое твое служение всему роду человеческому, благодарным сердцем и усты поем Богу, благоволившему на нас: Аллилуиа.

### **Икос 6**

Возсиял еси, светоносный Архангеле Рафаиле, яко светильник лучезарный и богоносный, егда возвестил еси праведному Товиту со Товием, яко ты еси един от седми святых Ангелов, иже приносят молитвы святых и входят пред славу Святаго. Волю Божию исполняя, наставлял еси

их Бога благословляти и величие Его прославляти, добро и милостыню творити, да совершая сие взойдут во обители небесныя. Сего ради и мы, смиренне покланяемся Творцу нашему и приносим тебе славословия сия: Радуйся, выну пред Господем за всех больных и страждущих ходатайствуяй. Радуйся, светом Божественным умы и сердца наша озаряяй. Радуйся, яко тобою истина Христова присно утверждается. Радуйся, яко тобою лицепрятие и человекоугодие посрамляются. Радуйся, врачей премудростию и человеколюбием обогащаяй. Радуйся, богатых в милосердии и благотворении утверждаяй. Радуйся, бедным отраду и вспоможение всемилостивно даруяй. Радуйся, к творению дел благих нас усердно подвизаяй. Радуйтесь, святии Архистратизи, Божественныя славы небеснии служителие.

### **Кондак 7**

Хотяй всем человеком спастися и в разум истины приити, Премилосердный Господь посла тя, всехвальный Архангеле Урииле, ко пророку Своему Ездре, дабы ты возвестил еси ему о близости перваго пришествия в мир Спасителя нашего. Мы же, сие поминая, молим тя, святыи Архангеле, научи нас Христа Бога паче всего любить и чистым сердцем Ему

воспевати: Аллилуиа.

### **Икос 7**

Дивно и чудно служение твое спасению рода человеческого, светозарный Архангеле Урииле, ибо тобою ум в богомыслии научается, мрак неведения прогоняется, сердца ревностию к Богу и милосердием к ближнему исполняются. Ходатайствуй же пред престолом Всесвятыя Троицы и о нас, взывающих ти сице: Радуйся, на путь исправления заблуждающихся направляй. Радуйся, нераскаянных грешников к покаянию подвизаяй. Радуйся, от плевел ненависти сердца наша очищай. Радуйся, истинной любви к ближнему нас научаяй. Радуйся, от мрака душевного и соблазнов мирских нас избавляй. Радуйся, радостью духовною нас дивно насыщай. Радуйся, взыскующих Божественныя истины радостное озарение. Радуйся, правды Божией во всем мире утверждение. Радуйтесь, святии Архистратизи, Божественныя славы небеснии служителие.

### **Кондак 8**

Странствующей Агари в пустыне Вирсавии явился еси, всеславный Архангеле Божий Селафииле, обетование Божие об отроке ея

изрекая и Божиим повелением глаза ея на источник воды открывая. Сего ради молим тя: обрати и наша взоры духовныя ко Творцу и Богу нашему, да чистым сердцем воспеваем Ему: Аллилуиа.

### **Икос 8**

Вся добродетели христианския, яко чада, от молитвы рождаются, и о сем промышляя, Всемудрый Господь дарова нам тебе, светозарный Архангеле Селафииле, ты бо в хладных сердцах наших пламень молитвы возжигаша, в уповании на милосердие Божие нас утверждаеша, Господеви усердно молитися нас научаша и взывати сие нас подвизаша: Радуйся, Бога любити паче всего нас научая. Радуйся, благоговение пред Всевышним в сердцах наших пробуждая. Радуйся, чистосердечным раскаянием души наша исполняя. Радуйся, за вся благодарити Творца нас наставляя. Радуйся, на славословие Божие всех нас созывая. Радуйся, во всяцем обстоянии взывати Господеви нас подвизая. Радуйся, сладостию молитвы своея в сердцах наших благоухая. Радуйся, молитвы твоя с нашими воздыханиями соединяя. Радуйтесь, святии Архистратизи, Божественныя славы небеснии служителие.

## Кондак 9

Всяк чин ангельский и вся сословия праведных купно с вами, всехвальнии Архистратизи, славословят Триипостаснаго Господа и Владыку нашего. И мы, земнороднии, аще и удаленнии от вас грехми нашими, обаче небесную славу очами веры созерцая, просим вас: молитвами вашими помозите и нам со всеми небожителми воспевати Господеви: Аллилуиа.

## Икос 9

Витии многовещании и доброгласнии не возмогут по достоянию изрещи обилия чудес ваших и помощи благодатныя, святии Архангели, по молитвам вашим верным посылаемых. Вы бо, любви и благосердие свое нам являете и прошения наша предваряете: ибо дадеся вам велия благодать на сие от Милосерднаго Господа нашего. Сего ради величаем вас сие: Радуйтесь, милосердие Бога Отца к нам приклоняющии. Радуйтесь, о прощении нашем Спасителя умоляющии. Радуйтесь, дары Духа Святаго стяжати нам помогающии. Радуйтесь, почитати Пресвятую Богородицу нас научающии. Радуйтесь, сладкою вонею благоухания Христова сердца наша услаждающии. Радуйтесь, ко стяжанию нетленных сокровищ нас подвизающии.

Радуйтесь, теплотою молитв ваших нас согревающи. Радуйтесь, от враг видимых и невидимых нас избавляющи. Радуйтесь, святии Архистратизи, Божественныя славы небеснии служителие.

### **Кондак 10**

Спасение рода человеческого устрояяй, Всеблагий Творец и Владыка еще в ветхозаветныя времена многократно посылаше тя, святой Архангеле Иегудииле, ко пророком и служителем Своим, дабы в истине Божественней их укрепити. Ныне молим тя, Богославный Архангеле, и нас во истинней вере Христовей утверди, от соблазнов и маловерия, ересей и прелести бесовския свободи, дабы нам купно с тобою Господеви воспевати: Аллилуиа.

### **Икос 10**

Царя Небеснаго и Творца всяческих во славе неизреченней присно созерцаеши, благословенный Архангеле Иегудииле, яко выну предстояй престолу Славы Его. Нас же, долу сердцем и духом поверженных, подвизаеши о славе Божией ревновати, в вере и благочестии возрастати, скверны греховныя удалятися и благочестивым житием Творца нашего прославляти. Сего ради, таковыя похвалы

приносим ти: Радуйся, монашествующих похвало и утверждение. Радуйся, святителей и иереев благодатное удобрение. Радуйся, мирян благочестивых духовное укрепление. Радуйся, к престолу Божию умы и сердца наша обращающей. Радуйся, праведных венцами нетленными на небесех венчающей. Радуйся, неревнующих о славе Божией к подвигом благочестия призывающей. Радуйся, кроткая и благая нравом благоискусный руководителю. Радуйся, нечестивых и душевредных обычаев неуклонный искоренителю. Радуйтесь, святии Архистратизи, Божественныя славы небеснии служителие.

### **Кондак 11**

Пение всеумиленное возносим ти, Архангеле Божий Варахииле, благословение Божие на вся наша благая деяния нам приносящему. Просим тя: укрепи нас всеблаготворительным предстательством твоим, да преуспевши в делах праведных, сподобимся купно с тобою Пресвятей Троице воспевати: Аллилуиа.

### **Икос 11**

Светоподательный светильник еси на свещнице Божественней, всеславный Архангеле Варахииле, пред Вседержителем предстояй и

умоляя радость и благоденствие нам даровати, в житии богоугоднем нас укрепити, сердца наша любовью к ближним озарити. Сего ради, в надеянии на твое неизменное предстательство, вопием ти сице: Радуйся, реки милости Божией нам источаяй. Радуйся, во всех добрых делах нам помагай. Радуйся, в милосердии Божиим нас утверждаяй. Радуйся, в уповании на прощение грехов наших нас укрепляяй. Радуйся, сердец наших благодатное умиление. Радуйся, помыслов наших светлое просветление. Радуйся, от пагубнаго уныния скорое избавление. Радуйся, семейств благочестивых в добродетелех утверждение. Радуйтесь, святии Архистратизи, Божественныя славы небеснии служителие.

## **Кондак 12**

Благодать данную вам от Бога ведуще, с любовью величаем и восхваляем вас, Архангели всехвальнии, за вся ваша наставления и попечения о роде христианстем. Сего ради, смиренно просим вас: молитесь о нас, да милостив будет Господь к нам, многогрешным, и по ходатайству вашему ниспошлет на нас благодать Свою, с любовью Ему о вас вопиющих: Аллилуиа.

## Икос 12

Поюще всеблаготворное предстательство ваше ко Всемогущему и Милосердному Творцу нашему, величаем Дивнаго во Святых Своих Предвечнаго Бога и почитаем вас, Архистратизи небеснии, яко молитвенников о всем роде христианством, ибо веруем, яко дадеся вам благодать недужныя врачевати, обидимыя заступати, в вере истинней колеблемыя укрепляти и на путь правды Божией наставляти, славящих вас: Радуйтесь, купно с Серафимы и Херувимы в чертозех Отчих вечно пребывающии. Радуйтесь, с Престолы и Власти Святей Троице хвалу воспевающии. Радуйтесь, с Господствы и Силы Творца неба и земли восхваляющии. Радуйтесь, с Начальствы, Ангелы и Архангелы Господа неустанно величающии. Радуйтесь, из глубины греховныя на высоту духовную нас возводящии. Радуйтесь, в заблуждениях духовных нас вразумляющии. Радуйтесь, окаменелыя сердца наша оживляющии. Радуйтесь, от напрасныя смерти нас избавляющии. Радуйтесь, святии Архистратизи, Божественныя славы небеснии служителие.

## Кондак 13

О, всеблагии и преславнии Архангели Божии, чудотворцы предивнии и врачи благодатнии, смиренно просим вас: вонмите малому сему молению и умолите Творца и Господа нашего отпустить нам вся прегрешения наша и сподобити во Царствии Небеснем воспевати Ему: Аллилуиа. Аллилуиа. Аллилуиа.

Сей кондак читается трижды. Затем икос 1 и кондак 1.

